

Cuira, ils 24 da fanadur 2023

Communicaziun a las medias

### **Incumbensà per la transformaziun digitala**

Ignacio Pérez Prat daventa responsabel per la transformaziun digitala dal rumantsch

La Lia Rumantscha deditgescha in'atgna piazza a la transformaziun digitala da la lingua rumantscha, cun la finamira da promover il diever dal rumantsch en il mintgadi. A partir dal december 2023 è Ignacio Pérez Prat responsabel per la transformaziun digitala dal rumantsch. Cun in pensum da 90% s'occupa Ignacio Pérez Prat da la coordinaziun strategica da projects digitals ensemen cun differentas partenarias e differents partenaris instituziunals. Plinavant collavurescha el a moda transversala cun tut las partiziuns da la Lia Rumantscha per aspects e projects digitals.

Ignacio Pérez Prat è oriund da Buenos Aires (Argentina) e sesent a Cuira. Suenter in studi da master sco inschigner en economia a l'Universitad Karlsruhe en Germania ha el lavurà en differentas funcziuns per plirs concerns industrials en Svizra. Plinavant ha Ignacio Pérez Prat rimnà 10 onns experientscha tar in grond purschider da servetschs da finanzas ed è tranter auter sa fatschentà cun applicaziuns digitalas. En ina scolaziun supplementara a l'Universitad da Queensland (Australia) è Ignacio Pérez Prat s'occupà dal management da l'innovaziun. Actualmain è el responsabel per l'implementaziun e la gestiun dal dossier electronic dal pazient ed enconuscha uschia las atgnadads dal servetsch public sco era la situaziun linguistica en il Grischun.

Andreas Gabriel, secretari general ad interim da la Lia Rumantscha, è satisfatg ch'igl è reussì dad occupar a moda ideala questa piazza impurtanta en il sector da la transformaziun digitala. «Nus essan leds d'avair chattà cun Ignacio Pérez Prat ina persuna fitg cumpetenta per quest post. Ignacio Pérez Prat dispona dad enconuschientschas profundadas en la planisaziun strategica ed il manaschi dad applicaziuns digitalas. Plinavant ha el ina gronda passiuin da s'engaschar per la lingua e cultura rumantscha, ina cumbinaziun ideala.» Cun la lavur dad Ignacio Pérez Prat vegn la Lia Rumantscha tenor Andreas Gabriel a pudair approfondar e cuntinuar ils pass strategics gia iniziads. En emprima lingia sa tracti da realisar ina coordinaziun cumplessiva da las activitads e dals projects a favur da la transformaziun digitala dal rumantsch per incumbensa da la Confederaziun e dal chantun Grischun.